

REZOLUTË

PËR VLERËSIMIN E VEPRIMTARISË SË KËSHILLIT DREJTUES TË RTSH-SË PËR VITIN 2010

Kuvendi i Shqipërisë vëren se:

- Këshilli Drejtues i RTSH-së ka paraqitur brenda afatit raportin “Mbi veprimtarinë vjetore të RTSH-së për vitin 2010”, në zbatim të nenit 93 pika 12 të ligjit nr. 8410, datë 30.9.1998 “Për radion e televizionin publik e privat në Republikën e Shqipërisë”, të ndryshuar;

- Këshilli Drejtues i RTSH-së është impenjuar në vazhdimësi për ngritjen e nivelit të RTSH-së në kushtet e konkurrencës së operatorëve të tjerë në tregun mediatik, duke bërë përpjekje për përmirësimin e parametrave që ndikojnë në ngritjen e imazhit të këtij institucioni tepër të rëndësishëm të vendit;

- Këshilli Drejtues i RTSH-së vëmendje të posaçme i ka kushtuar punës së strukturave drejtuese të RTSH-së për thellimin e procesit të reformimit të këtij institucioni, si një institucion kombëtar publik, siç e përcakton ligji;

- Siç është nënvizuar dhe në raportin e Këshillit Drejtues të RTSH-së, Kuvendi vlerëson përmirësimin e situatës financiare në shumën e 353 milionë lekëve, ose 65 për qind më shumë se në vitin 2009, të ardhura këto kryesisht si rrjedhojë e arkëtimit të tarifës së aparatit marrës televiziv dhe të përdorura në funksion të prodhimit dhe të investimeve;

- RTSH-ja, sidomos gjatë vitit 2010 e në vazhdim, po punon intensivisht për përmirësimin e parametrave cilësorë në shërbim të teleshikuesve. Gjatë vitit 2010 ka vijuar përmirësimi i strukturës programore, përmes rifreskimit të ekranit me emisione cilësore, që kanë rritur shikueshmërinë e publikut.

Kuvendi vlerëson se:

- Në programet e RTSH-së vërehen arritje në drejtim të rritjes së pavarësisë editoriale;

- Përmirësimi sa më i shpejtë i kuadrit ligjor është i domosdoshëm në rritjen e efikasitetit të strukturave të këtij institucioni;

- Në dobi të procesit të nisur për përmirësimin e teknologjisë radiotelevizive dhe kualifikimit teknik e profesional të personelit të RTSH-së, nga ky institucion shumë i rëndësishëm, duhet një mbështetje më e madhe nga Buxheti i Shtetit;

- Duke vlerësuar përpjekjet e vazhdueshme për përmirësimin e strukturës programore të RTSH-së, Kuvendi nxit përdorimin e formave sa më efikase gjithëpërfshirëse të dialogimit qytetar, të cilat mundësojnë ndjekjen në dinamikë nga teleshikuesit dhe dëgjuesit ndaj këtij operatori;

- Një vend të rëndësishëm në emisionet radiotelevizive duhet të zënë emisionet për kategorinë e personave me aftësi të kufizuara shqisore;

- Këshilli Drejtues dhe drejtuesit e RTSH-së vëmendje të veçantë duhet t'i kushtojnë rinovimit të teknologjisë digjitale të RTSH-së dhe përshtatjes të saj me stafin e kualifikuar profesional;

- Strukturat e RTSH-së të rrisin ndjeshëm efektivitetin e punës së tyre për rritjen e buxhetit të këtij institucioni, duke siguruar fondet financiare jo vetëm nga Buxheti i Shtetit dhe taksa mbi aparatën marrës, por dhe nga një larmi kontratash me palët e treta për transmetime të ndryshme;

- Kuvendi vëren se nga Këshilli Drejtues i RTSH-së nuk është zbatuar neni 88 pika 6 i ligjit nr.8410, datë 30.9.1998 “Për radion e televizionin publik e privat në Republikën e Shqipërisë”, të ndryshuar, lidhur me hedhjen e shortit për përcaktimin e mandateve të anëtarëve të Këshillit Drejtues të RTSH-së.

26 maj 2011

KRYETARE
Jozefina Topalli (Çoba)